

四庫全書

集部

欽定四庫全書

紫山大全集卷三

元 胡祇遹 撰

五言古詩

寄平章相公

正夫苟立志自負期有成矧曰廊廟材所係良非輕可  
憐子房公微疴屢纏縈服食日節慎竟不傷和平志壯  
氣不衰終能保遐齡勲業千世後光與日月爭乃知命  
世才造物豈虛生黃金到百鍊然後見堅精我能却厚

味誰與生五兵我能薄嗜欲何者為傾城讀書有餘力  
或可窮醫經為國當自愛鄙言出真誠

寄張平章

鼎不可拄車馬不可守廬所用違所長事廢身受汚牧  
民豈閒職擇人頗荒蕪屈伏不為恥將身辨奔趨奴顏  
映婢膝自謂與世符偷竊供賄賂甘與貪吏俱喧爭肖  
羣鷄錯雜同亂鳧中置一老鶴矯亢形影孤飲啄既相  
異飛鳴不相如未免生忌疾天稟不可誣豈無清溪水

充飢足菰蒲豈無清山雲曳曳澹相娛塵網會可脫此  
志老不渝誰憐孟公綽黽勉滕大夫

贈答王子淵

幼年氣血滑得枕即成睡過來一何哀既寤不復寐寒  
齋夜迢迢展轉擁衾被所喜得佳友對榻話相慰上論  
古先哲下議及當世訂定到數返朗豁發蒙蔽餘談及  
文辭歷歷舉凡例人生豈無友晝接暮分袂豈如吾二  
人親戚同比翼不因抱官囚此志何由遂已失羈旅懷

愛悅那有既譬彼瘡痍人食蜜自知味三益不可忘况  
復辱佳製他年再相逢一笑成故事至元四年冬迺灑  
及春季作詩匪誇言聊以紀時歲

馬仲驤持紙索詩書此以贈

平生無嘉言所作不留藁年來志已衰漫與尤草草應  
物隨遺忘寧堪挂懷抱長笑嗜詩人肺肝百搜攪區區  
好名心雕斲求媚好得句如得官窮苦甘衰老此心幸  
無事何勞慕郊島我幸脫此疾捫腹喜安飽可憐梅聖

俞思澁費探討仲驤持紙來求詩大堅禱恨無草堂筆  
快意一揮掃書此自解嘲相對為絕倒

贈霍秀才賢父子

舉世趨近利晨樹午求陰例將賢子姪置身惡木林朝  
伴豹虎攫暮逐鷗臬吟結習熟貪鄙何者為良心所獲  
毛髮比所喪江海深英哉霍氏子好古不同今學為孔  
孟學俗儒非所欽優游天爵貴不希帶橫金一言我相  
勗正學久消沉虛文慎勿作聖道日搜尋曾次富義理

咳唾錦瀉淋洩路非遙千載有遺音蘇旱或可遂滿袖傳雲霖

贈劉道濟

自聞道濟名於今踰十年不識道濟面懸想心茫然今朝忽相見久渴逢清泉何勞話平昔聲跡稔相傳苦學得深趣性理自一天辯論千古事水鑑臨蚩妍恥與俗士伍奮拔希前賢自負良不淺但恨天公偏喪偶二十載枯淡成癯仙父子夜讀書晨爨寒無煙四壁倚甌石

壯心窮益堅題詩窮勝槩忘歸縱留連名僧及幽士倒  
屐歡招延人皆見委順是未知君全志大惜未遂孤影  
成華顛嘗觀造物理否泰無定專物將亨於後未免空  
於前大器貴晚成不與細物肩皇皇聖天子選士窮八  
埏只今數時彥定讓先蕢先長才了經濟五馬乘華軒  
粉白間黛綠一一要君憐富貴忽相逼勿忘余知言

贈張經歷

丈夫貴剛勇應物宜中節義理與血氣善惡不同跡剛



勇不好學狂亂交相賊失善而入惡背吉成凶德潛心  
聖門學體認何細密惡不遜為勇惡訐以為直惡居下  
訕上惡果敢而窒惡勇而無禮惡以剛成復剛勇豈如是  
聖訓甚明白改過毋少吝見善如不及利欲莫能動威  
武不能屈大勇與至剛坦途豈難識舍彼而取此黽勉  
趨聖域

寄王子勉侍郎

劉生投京師意欲求薦章位卑人望輕安能助揄揚朝

廷念知識孰信朴直腸騏驥奮鬣鳴顧我非王良  
呶呶百稱譽幾何不為狂我言一脫口反恐生雌黃  
仕途亦多岐有之皆騰驤譬如徑寸珠炯炯照夜光  
人皆知可寶安忍道路傍臺閣富才彥舉能秩所當  
去去振羽翮一舉誰能量

答張經歷乞言

友道廢已久諂媚相逢迎意氣少乖忤蓄怨生怒憎  
三益與三損取舍誰復明接際若膠漆機穽伏戈兵  
嗤愚

鄙不肖妬賢而病能無先後貴賤把持復侵陵常使我  
負人百偽不一誠厚薄無定在勢利為枯榮習俗日薄  
惡鬼蜮紛縱橫經歷清河公刮目求良朋徵解索告戒  
庶作座右銘我師馬伏波格言常服膺朋友有過惡如  
聞父母名閉口不可道勿妄生譏評寧使人負我有犯  
忘較爭宗族稱孝弟忠順事公卿德如金玉溫氣若芝  
蘭馨所聞止於此清聽恕狂鳴

寄子裕參議

大賢不叢生大器不早成才學兩超絕幾人遇休明壯  
年復幾何倏忽如流星古來豪傑士貴志埋幽冥我輩  
何多幸筮仕逢昇平有口得盡言有學不留行海嶽無  
可補祿秩春陽升共覲雖雜進奚損夔臯名元惡蒙顯  
戮端人整朝纓近來到京闕臺閣列羣英選材極精粹  
大廈安無傾天眷日益厚西北漸休兵元勲踵賢王無  
恙朝天庭聞說京師人喜劇默無聲聖賢復相合草木  
含芳馨人生值茲時菜食亦已榮致懇諸時彥壯心勿

凋零

寄張郎中可與頤貞

高齋號頤貞，斂衽難為銘。不識主人面，因名見幽情。舉世愛春華，何人樂秋成。此心失正鵠，無異波上萍。客來話高義，事事喜且驚。汪洋萬頃陂，誰能測沉冥。洪濤觸砥柱，困憊自東傾。貞者事之幹，學易良精明。真積力已久，氣以集義生。正當服官政，非君孰澄清。豈同口舌儒，文筆了生平。何時遂願見，再拜咨易經。

答洹溪見贈

先生挾雄才早以文字名古文學西漢立志不自輕天  
步忽改玉潮落閒長鯨棲遲鎮州幕探討益深精豐碑  
每旌紀有客來求銘得文蔡中郎死生兩為榮胷中金  
石列輕重持權衡十年總雄藩理劇筆不停篇章偶游  
戲擲地皆金聲金鑒選羣彥拜詔升帝庭九制付一掃  
晚健秋風生人生獨何幸談鋒得時聆三年侍几研神  
膏洗昏盲狂斐不自量惡語瀆門屏豈期辱裁答愧汗

沾塵膺新詩一何似練練秋江清變律出新意暗覺無  
劉應閒窻得首肯安用四壁驚世無謝玄暉茲言欲誰  
評俯慙舞籬鷄仰空望雲鵬我廩亦已倒君囊未云傾  
願賜起予念得與詩壇盟定應勞薰沐踏月扣深局

贈畫師張潤之

造物生異人妙處不自知畫師奪天巧徑欲形似之以  
神貫彼人滿紙見丰姿朱粉一融化如以印印泥我心  
適有在示汝橫氣機勿作真寔相此理誰窮推必欲得

吾真刮目深窺窺

寄李二衍甫友舊

總角慎擇友似君能幾人  
君心淵以默我懷粹以春  
外若不易合中情藹相親  
聯句風雪夜並轡花柳晨  
相離復相覓敬慕日益新  
君慕我無偽我敬君無塵  
有失須告教接納從具陳  
有美不口譽暗若獲嘉珍  
古人不可到已脫鷄鶩隣  
相逢百慮消何者為賤貧  
年來成遠隔欲會良無因  
君思我應切我夢君亦頻  
千里共明月出



門望通津尺書何寥濶亦豈少鴻鱗寒溫諒無益懶散  
任情真君閒日無事田園坐荒榛我官久不調進退兩  
遭迤相思復相笑有愧半百身萬事盡乃爾一心恒苦  
辛何當謝手板復我洹水濱舉網得嘉魚杯羹雜薇蕨  
再遂林下約困羽時一伸踏雲共携杖對月同岸巾有  
子辨溫飽世作無懷民安知青雲表高閣聳麒麟

寄李裕卿友愛

憶昔少年日不識分攜愁朝為閭里嬉莫為閭里游  
憶昔少年日不識分攜愁朝為閭里嬉莫為閭里游

如同隊魚相失即相求江山為我妍日月為我留古今  
共掇擊詩文相唱酬艤舟南塘夏戲馬廬山秋入門父  
子歡出門朋侶稠笑談俯仰間宇宙一虬螭朱顏映綠  
髮一官非所憂自期學業成舉翮超崑丘得失道復行  
絕足追伊周坐信古人書歲序闇如流龍飛啟昌運仕  
籍粗見收隨廢復隨起急雨水連漚朝應列宿光暮與  
編民儔我趨東州幕君登省郎輞我曳辭林裾君轅復  
西州相望五千里萍梗兩悠悠相憶不相見塊若鷹坐

鞬碌碌逐人後不異羣飛鷗反為流俗嗤誰復信良籌  
夜為一無賴晨封千戶侯舉國疾有口一拜參廟謀人  
生各有命敢欲誰怨尤念君得稅駕桑梓復優游吟登  
舒嘯臺醉下飲酒樓讀書復觀物萬象愁宜搜笑我宦  
遊惡相如今白頭進退良有道用舍隨沉浮已慙三徑  
草更愧五湖舟

薦士一章呈子方郎中飛卿侍御子裕尚書受

益侍郎

鷺鳥雖類百一鷄不易求大廈萃羣木梓人慮何周選  
賢尚公舉四海無朋儔同已不敢親異已不敢仇為國  
而得人此心何休休羣彥入臺閣有口皆譌謳下滿萬  
民望上解吾君憂我作薦士詩未審垂聽不人生無全  
才用舍隨所優洹水誠淺澁固有萬斛舟一二濟川手  
試用當急流馬驥字希驥實學無虛浮論事到通方有  
唱而輒酬修鱗縱大壑俊鵲橫清秋亦有張仲豪氣壓  
元龍樓明敏不疎放縝密無停留耿介崔子冲縣治何

優游五年官災方還家去時裘三人者如此鄙言非賸  
投儻遂處囊雖脫穎非悠悠

寄宋齊彥

丰度嘗暫違令人生鄙吝一別十七年杳不接音問孤  
陋寡交遊庸懦不自振看書未開卷哀思已昏悶異時  
或相逢老醜勞細認鬪馬成坐睡妄想俱忘盡覺來問  
童僕又欲黃昏近廟堂咨故老謨議發硯及秉筆白玉  
堂羣賢仰清峻人來話起居德業日升進詩文肆口成

草聖電雷迅老耳聞斯言夢寐見神俊斯文天未喪付託當自信大賢不虛生晚節宜重慎

寄答王仲謀

心交義已重世契情尤親結髮相追隨歲年偕七旬所學與踐履言行頗同倫俯慙太疎懶仰慕能精勤文章妙天下更欲名千春讀書老益壯立言日求新客來辱佳什字字希世珍日長正昏睡拜誦整冠巾勤厚思報復握筆不能文南望徒引領青山生暮雲

寄伯祿繼先子裕伯宣

泉源出山巔潤下能及遠居官處廟堂長才庶可展恩  
澤霑四海竹帛燦華顯豈同州郡職碌碌互流轉傳聞  
得榮拜清議稱妙選何煩責望深自期良不淺老懷喜  
不寐芥蒂日消遣貪為中外賀鄙語失裁刺

答子昭贈筆

子昭喜法書能知筆工拙玄霜煮鼠鬚得藝到精絕纖  
圓見倫理適勁傲盤折起伏應提策頓挫愈健捷筆疵

良多端試為一論列鋒危多困弱過促亦驚桀中虛易  
渙散太寔傷擁結而能四者間求全得心訣學書運筆  
耳十筆九凡劣就能到神御終亦因點畫筆人例塵俗  
定謂何妄說子昭非賤工英氣溢眉睫輪扁老斲輪進  
道時自悅老鈍貢霜毫湘筠效奇節弄侮管城侯冠巾  
髮如雪老我初學書筆塚擬山疊每恨毛穎公違忤不  
相協自茲可適意買紙整囊篋但恐求書人笑我闕無  
鐵



送祝仲容都事之任湖北

朝廷求治切仕途故平寬一言與片善暮進朝拜官況  
以吾弟才游及豈多艱處囊今始得脫穎驚衆觀鄂岳  
湖北道事務固殷繁民情大可見饑者易為食德政一  
流行歡聲海波翻聞登岳陽樓塊視湖南山先賢文正  
公立志當追攀幕官非久留引領望歸鞍

寄贈河南監司

不識相公面仰聽相公名何時拜清光老眼昏復明近

世為學人志在求祿榮所學非所用真狗苟蠅營淫辭  
微寵利前學已忘情以言較行實奚啻炭與冰悖遠聖  
賢域絕口不談經儒為胥吏弄強逐姦邪行甘溷涇流  
濁厭惡渭波清竊名實嗜利犯義仍犯刑儒學乃如此  
莫怨人賤輕用若輩臨政何事得平寧相公出貴種世  
為貴公卿力學君子儒直造東魯庭正己而物正清心  
照邪橫事業期伊尹與世為權衡我雖老腐儒不流為  
流萍狂言浼清聽終當拜嚴扃

邇來復齋洹齋二學士屢以五言相唱酬不鄙  
愚庸每成章即亦垂示賞嘆誦咏贅作六章  
時至元四年七月也

致力師前言每墮詞語陳冥心效前意興寄不得新辭  
理捨前哲孰洗習中塵寥寥入深心作氣時自振博學  
以廣才一引思百伸斂彼言外意養我筆底春要當青  
出藍終恥隨效顰英哉杜少陵作語期驚人

太白固豪放不受義理拘誦詩想其人飛龍叫天衢萬

籟不敢鳴雷霆隨叱呼海江共一唾幾吸四溟枯霏霈  
瀉時雨餘霏散璣珠甘潤著萬象英華散春腴王風久  
不振要接大雅裾俯視建安人委靡幾嬰姝

沉沉杜少陵坐笑太白豪作詩每持贈時亦示譏嘲後  
人定優劣洶湧如風濤二賢豈難辨口舌徒嗷嗷文章  
貴適用美惡不可逃政教苟無補辭雄亦徒勞

發興如湧泉愈汲味愈清安用啜糟粕虛無剽竊名百  
物來扣心肆口即成聲了不見牽合精粗聊稱情采菊

東籬下何時值淵明

開口論時政位卑罪言高開口談今古是非九牛毛開口說物理理微足譏嘲開口議文章聽者厭呶呶百慮無營為真心味詩騷木落恐草稀雲清金氣豪得句時自娛長吟行樂郊

大哉風雅頌用之亦非輕至情為物激哀樂即成聲民心見向背國政知瑕貞薦享拜郊廟昭假歆百靈聰聰吳季札審樂知庶徵所以孔聖訓諄諄于過庭可憐千

載後祇以寫閒情貴達無一言窮窘恒咿嚶不為怨怒  
語即為寒乞鳴遂令當路人聽之等蛙蠅雅樂不復作  
鐘鼓徒彭鏗

贈孔子五十四世孫曲阜令

人為名父子尚恐寡肖似受身於聖人惡可不尚志聖  
德若唐虞一傳苦無嗣洋哉聖師澤無代無名士德與  
天地並報享窮天地東望竊有感嘔噓隨涕泗漢唐傳  
至今崇敬到極至襲封衍聖公賓禮貴無二百家林廟

戶洒掃幾千祀譬彼江與河萬古流不廢不意便斬絕  
茅茨暗堦陞茲事世共知廟算非失計人苟不自悔云  
誰敢相戲嗣聖既無人勿怨虛其位敢告曲阜令聖學  
當自致皇皇建極功安忍輕暴棄國家崇聖心日夜求  
英裔

懷康兄國材

君材若鵬鶚海運羞寧居胡為斂長翮郊野葦園廬無  
乃厭官卑祿薄不腴軀請為君解嘲匪我相佞諛丈夫

期濟世豈以寒餒驅萬鍾不義受傲睨如芥珠朝為麤  
官怒暮聽俗吏呼一善未能行百辱相縻汙人生異雞  
狗衣食何足圖負郭五頃田有奴代耕鋤放水不勞力  
種藕春滿湖循牆及園圃木奴養千株素候日高起甘  
旨從妻孥容為巢許隣聖世超唐虞

寄復齋洹齋二學士

辭多亦奚為字字合精深辭理兩俱勝粹若百鍊金口  
稱竟何榮要使愜予心太羹無遺味大樂無遺音我師



少陵語詩罷自長吟

送彥才參政西行

翩翩海東鵲舉翮數千里整毛萬仞山得食青冥裡栖  
栖場圃雞尋丈不能起一飽不異營啄啄尋螻蟻君才  
班定遠洗劍西海水老我馬少游將迎心已矣舉杯送  
君行茲行誠可喜長才當大用豈徒封爵美我朝際天  
覆車書一文軌沙磧吾近郊誰能作邊鄙以君經畧材  
須君勞尺筭邏列拜馬前微垢不煩洗西寧金氣穰三

錢輸斗米

寄崔中丞

大臣思報國所急惟薦賢得人政乃舉無人法空懸我  
家大忠厚輕重略衡權邪正既混雜是非亦紛然賢愚  
豈難辨試功不以言國人皆曰貪未嘗私一錢國人皆  
曰廉門閭如市鄧毀譽求善惡聽納寧不偏執事主臺  
政選賢少安眠聽言復觀德取長不求全為國得一士  
引挽恐不前因士得一語力行不留連執事持此心炯

烟金石堅聖鑑照此心聽納如轉圜廟堂富梁棟臺閣  
足龍鸞庶政無廢事太平日如年歸功更誰往國史青  
長編

送王錄事秩滿北上

能吏多健羨於道未為貴祇得上官憐非為細民利賢  
哉王錄事深恥矜小慧百冗繁劇間有餘求月計雖無  
驩忻譽亦無猛虎畏三年安陽民夜犬不聞吠叩門來  
告別秩滿當隨例愧無薦鶚書臨歧但揮涕吏部清鑒

明終難久沉滯

贈送劉濟甫之大都

清議廢已久士價一毫輕可憐薦士詩唧唧寒蟲鳴人  
如孔文舉虛文尚誰聽況我老腐儒素與才無名愛汝  
有用姿送行豈無情一言亦不惜係汝何枯榮丈夫當  
自奮去去投帝京作文謝浮辭論事令世驚仕途太平  
寬自薦鳴不平壯志已棄繻長才宜請纓望望追電足  
萬里不留行

送僉事清甫應都省勾請

天下一大厦完密資羣材巨細各識職永永無傾摧古  
來知人難明哲慎鑒裁拔萃豈易得灌莽雜蒿萊百圍  
樛棟資寒暑幾往回良匠失時過偃蹇倚巖隈大臣佐  
明時求賢不忘懷遴選得一士拔擢超資階都省總大  
政諭議須全才徵書照齊魯攬轡勿徘徊

寄王樞府

一歲凡三遷臺院爭薦舉通才切時用豈與噲等伍疾

邪發竒章談兵示英武正言滿烏臺婉畫鳴樞府長翮  
得雄風摩雲日騫翥紛紛庸俗子黽勉困規矩老眼見  
竒特哀懦成鼓舞今春餞君行有言未能吐魯鈍留至  
今負罪那可補鄙俚聊謝賀粗代寒溫語

贈送安郎中仲容還吏部

古今世祿家例為豪習誤富貴可坐得竒偶不知數翮  
翮安公子拔萃能穎悟學語知好學誓不勤師傳裘馬  
如土芥取受脂粉污詩文字畫餘精敏識時務一片經

濟心耿耿無寐寤天官乏中郎元豹難隱霧筆端山谷  
啟軒豁快呈露乃見仁者心善惡公好惡願君持此志  
絕足得長路功名正黑頭努力未遲暮

寄杜提學

前年得君詩似亦怨枯槁作詩欲裁答恐君嗤草草念  
君瓌璋志奚啻圖溫飽致身青雲上舉措伸斯道諫章  
爛雲錦萬類遂安好奇勲映佳名曉日同杲杲人誰無  
是心衡門坐空老古今懷材人立身苦不早宣尼果何

心俯默蘊天藻甘蒙陽貨譏迷邦獨懷寶一食魯倉粟  
安危不自保車轍滿天下皇皇傷潦倒豈知千載後世  
變益紛擾一正敵萬姦能為不傾撓我懷素餐憂我言  
非佞巧有子幸克家心閒世緣了著書貽後人什襲珍  
遺藁俯視論功人滄海一行潦寄詩命安齋熱中應一  
掃

贈孔子五十七代孫曲阜尹

身為聖人後責任良非輕朱均固自污亦匪堯舜榮聖




人不可階賢堂宜力升一編中庸後代代多名卿淺深  
固有間啖唾循典刑金塵與玉屑賦稟異精英衍聖人  
絕襲夢寐當憂驚百餘香火戶近亦隸編氓此誠姦吏  
計奚傷日月明奉先思盡孝寧可同凡情身先篤為善  
英譽升天庭誠敬率諸生行修益明經作成三數子張  
主斯文盟洙泗續遺響師表佐昇平

送趙李明赴召北上

氣質萬不同聖凡係所受天稟何高邁得造物神秀日

記數千言一覽不勞又胃中九經笥字字無遺漏前言  
與往行知識若親舊以茲窮義理何事不詳究以茲吐  
文章筆落風雨驟譬如日月光天地河山透又如春風  
生川谷成錦繡聖訓多見聞所恨窘愚陋回也其庶幾  
哀哉天不壽所以嘆才能懼乏斯民救異人豈易生聖  
賢千載邁天生瑞聖世奚欲專句讀朝夕備顧問置之  
宜左右上談唐虞盛下及五季後所問無不知所知日  
敷奏蒙詔令疾趨玉殿開清晝一封政事書四海恩深

厚嗟嗟老病身不及詩攜袖側耳聽佳音扶杖起衰謬



欽定四庫全書

集部

紫山大全集卷四

詳校官中書臣孫球

侍讀臣孫球覆勘

謄錄監生臣劉堦

謄錄副貢生臣杭光晉

欽定四庫全書

紫山大全集卷四

元 胡祇遹 撰

七言古詩

昊天觀羣鶴圖歌

并序

晉祠之北五里山曰龍山山巔有觀曰昊天殿閣金碧松檜陰森行人望之如在半空翠嵐晴潤白雲晚閒鐘磬步虛之聲散落人間實為國祈天永命之福地也竊嘗思之敬鬼神事天地齊潔嚴肅誠一虔恭

之心人皆有之然不擇其地雜於闐闐市井之間雞犬聲跡之外明神鑒之亦莫之臨若昊天觀之地靈境勝高爽幽寂超出塵表宜乎百靈之降集羣仙之游歷也至元十三年清明後三日羣鶴自西南來翔舞於壇墀飛鳴於殿墀前後頡頏各有行列移時方相率衝雲表入碧虛由東北而去河東士大夫賦詩成巨軸道士以為瑞應繪圖請序其端仍隨例韻語以歌之

龍山昊天萬壽宮棟宇直欲摩蒼穹塵世殿閣非所同  
豈徒眩目誇青紅寶香牕戶含天風簷牙朝暮白雲封  
霧迷松逕不可通仙境豈許人力窮人間時得聞磬鐘  
祥霏瑞靄常濛濛乘鸞翥鳳度碧空仙輶神駕相迎逢  
召公近奏平南功萬方賀表如山崇神人咸和喜時雍  
羣仙集慶忻相從萬鶴翔舞空明中法宮嘉宴不怱怱  
移時雲影迴仙蹤吾皇萬壽居九重四海為家金四墉  
仙翻歲歲來朝宗

又題六鶴圖

心非青泉白石姿掌上丹砂亦徒施高情愈遠愈難寫  
世無薛稷誰瑕疵常觀庸筆寫真李太白塵顏俗狀軒  
昂眉目何異醉飽屠沽兒九臯清唳勞我思觚哉觚哉  
鳳兮鳳兮奚止於是堪嗟咨

農器嘆寄呈左丞公

夜宿田家耿無寐窗外主人長嘆喟歎聲未絕還獨言  
言切音哀復歛歛國家敦本知愛農特設大司專保惠



分司勸諭立課程朝送農官暮迎吏誠言諄諄不敢忘  
榜示門牆加勉勵小民衣食在田畝孰願饑寒仍負罪  
火雲赤日汗流土月落參橫手扶耒起時投種惜雨乾  
泥淖耘苗恐荒穢繭絲租調僅供辦衆口嗷嗷憂卒歲  
火燒炕煖代衾裯藜藿何嘗識鹽味農家辛苦感國恩  
農具依前俱勿稅木根損鐮石損犁取與鄉鄰不難置  
行商到門問有無粟麥絲麻相換易有時負價卒莫償  
累月經年不嗔恚農人種田爭寸陰農器易求無止滯

年來貨賣拘入官苦窳偷浮價增倍賣物得鈔鈔買鐮  
又憂官局遲開閉入城最近百餘里數日遲留功漫費  
耕時不幸屢破損往返勞勞凡幾輩往來勞苦不憚煩  
一刻千金惜虛廢欲於農隙多置買粟帛無餘百無計  
農官農官助我耕何異奪薪催釜沸一鐮廢奪十農功  
辦與官家多少利勞形餒腹死甘心最苦官拘賣農器  
捕蝗行 并序  
至元六年北自幽薊南抵淮漢右太行左東海皆蝗

朝廷遣使四出掩捕僕奉命來濟南前後凡百日而  
絕故作是詩

老農蹙額相告語不憚捕蝗受辛苦但恐妖蟲入田中  
綠雲秋禾一掃空敢言數口懸饑腸無秋何以實官倉  
奚待里胥來督迫長壕百里半夜掘村村溝塹互相接  
重圍曲陷仍橫截女看席障男荷鍤如敵強賊須盡殺  
鼓聲摧撲聲不絕喝死豈容時暫歇枯腸無水煙生舌  
赤日燒空火雲裂汗土成泥塵滿睫上下杵聲如搗帛

一母百子何滋繁聚如羣蟻行驚湍嘉穀一葉忽中毒  
芄芄枝幹皆枯乾無乃民勞吏無德可能百郡俱貪殘  
廟堂調燮亦有道胡為凶蠶來相干聖躬愛民夜坐起  
遣使日馳三百里太宗吞蝗那可比願隨時雨俱為水  
誰憐粒食誠艱食螟螣蝻賊口中得土戰勤勞血戰憂  
田家一飽豈易求今冬斗粟直三錢力迴凶歲成豐年  
公私倉廩兩充盈大車小車輸邊兵

後捕蝗行

飛蝗撲絕子復生脫卵出土頑且靈有如巨賊提羣朋  
羣止即止行則行過坎涉水不少停若奔期會趨遠程  
開林越山忘險平倍道夜走寂無聲累累禾穗近秋成  
利吻一過留枯莖生機殺機誰控衡強梁捕取理亦明  
深塹百里中有坑投軀一落不可升億萬鍾杵敵汝勅  
肝腦塗地如邱陵行人兩月增臭腥吐哉妖蟲竟何能  
火雲赤日勞羣氓

征戍嘆

吁嗟兵制胡不均富室益富貧益貧百丁萬畝不介胄  
重以高爵榮其身鞭笞卒伍等徒配暴橫刮刻誰為嗔  
兩椽茅屋一孤影妻子寒餓常酸辛終年應役欲誰代  
窮邊刀斗昏復晨樞府哀憐立新法三家兩家為一門  
終竟富不與貧偶扶持支助徒虛文困弱相依日詞訟  
祇與案牘供錢緡病亡逃代姦百出勘會保結何紛紛  
一兵征行一夫送征人甘分嗟農民長途往返少違限  
追呼撻箠連比隣積年逋竄不可復官吏負罪眉亦顰

我無長策拯斯弊執筆判署空憂勤

趙仲器治古齋

古人制器藏妙趣立法取象非徒為精堅密緻乃餘事  
象以形著義理隨斷耜耨耒取諸益網罟生自明兩離  
剡舟剡楫風水渙弦弧鏃矢火澤睽器成借力百工手  
其原聖哲勞深思嘗觀博古圖至理誰復推夏金鑄禹  
鼎萬怪不可欺湯盤及周敦形模亦多儀文章照款識  
一一垂誠辭備物薦郊廟格天神地祇寶藏遺後嗣百

世咸宗師唐王踐祚受冊命東房西序何輝輝秦漢而  
下不遵古詭形怪狀逐意移浮華苦窳求悅目工不信  
度隨我宜朝嗟觚不觚暮嘆匱非匱干將鏌鉞聽呼索  
翻以古人為拙癡下不順物性上不循夫時淫巧互凌  
跨小智爭自私隨成復隨敗所費恒不貲周官考工篇  
迂濶何足規嗚呼百器尚如此禮樂刑政良可知鍾鏞  
誰復辯恣憑擊石拊石從高卑偶因制器傷世變書作  
冶古齋中詩



和婁參議詩韻

困趨迎厭奔走對鏡茫然慙皓首正爾無物洗惡懷百  
韻新詩得元九薔薇佳酒清滿壺珍重相邀一開口下  
榻拂凝塵却掃降敝帚人生會合難多奇而少偶我思  
見君莫逆交君亦期予歲寒友風期相合不易得一笑  
一談寧肯負把臂細論文舉白豪吸酒忘形到爾汝苛  
禮不煩守玉纖瓊甲送觴來籌合新歡閒袖手鱗錦馳  
酥厭八珍肴藪雜陳集山藪餘馨剩馥飽僮僕白飯青

藟及馬狗兀然一醉百念銷人間萬事無所有晉賢誠  
達人飲不論石斗豈不自貴重誰與辨禾莠潘岳一縣  
花陶令五株柳趣向既已定百欲不可誘曾次自涇渭  
口不出臧否花梢紅日上東軒竹影清風來北牖山鳥  
山花吾友于鶴唳猿吟和呼吼家奴種黍供糟床取足  
何須論百畝拘囚笑謝國中人放曠願同林下叟青田  
飛白鷺了不受塵垢肆志輕世懷肯以事掣肘歲穰歲  
凶儘百年不貪寅卯憂申酉雨足竹生孫霜餘芋依母

舉觴酌先酒稷為百穀后遣興羞為李賀詩搗擢腎腸  
心欲嘔笑傲得此生乘化從老朽自知乍可為雞先附  
尾那能作牛後琴書及妻子攜抱從左右欲眠即過午  
思起何礙丑漁竿與耕鋤自視等草綬柴闥晝掩無俗  
客雞犬依依成牝牡貧賤如磐誠自樂富貴浮雲非我  
厚坐憐門外趨迎者婢膝奴顏競妍醜道亦非吾道氣  
亦非吾耦多君高志出冥鴻駟馬千金還弗受歸來暇  
日理田園菽粟豐穰積山阜床頭時自釀佳醪笑會賓

朋享期壽未患莫知心匪石歲寒後知松栢久

送張子政

君不見蕭何乘時起刀筆漢室開基功第一長才變化  
蛇作龍安敢區區較前跡身名勲業合俱高滿眼黃金  
同瓦礫古人居官長子孫後人防下如防賊三年轉官  
復轉吏誰議姦生由法出法益精嚴情益偷治罪何如  
先養德丈夫此身當自重悖得到頭如順失誠君廉慎  
繼公勤邪正邇來分白黑松植蓬蒿易出羣木從繩墨

何勞直簿書奚足老英雄舉首鳳池何咫尺

送孫伯淵

衰老無事門長扃扶杖起應敲門聲續孫二子來告別  
往應吏部三呼徵人才自古應世出山公啟事今公平  
不才廢黜能者進細木為桷大為桷妍醜詎可逃明鏡  
重輕未易欺權衡不患無位患難立二子素有廉幹稱  
但秉赤心思報國何憂不作貴公卿

贈劉講師

靈臺山下虛極觀主人劉姓字子真年登八十益強健  
道氣益塞烟露身鄰家井深二百尺鑿井得水如有神  
志形絕學鍊精魄千年要作羲皇人松牕夢起笑人世  
蚍蜉擾擾爭紅塵有時隨俗入城市落花飛絮長安春  
嗟予本非聲利士常懷漉酒淵明巾急流勇退會當遂  
杖履徑謁清渭濱

贈黠菴邢仙翁

黠菴仙翁吾不識趙佞作傳求詩什仙翁高年今幾何

童齒黃冠今八十無事經年不到城有脅平生不沾席  
養虛寥寥入至虛調息綿綿作胎息黃精肥甘松子香  
腐臭人間煙火食厭聞世上海飛塵飽見巖前松化石  
每將螻蟻等王侯直以春秋比朝夕迴頭俯視長安城  
哀死榮生幾歌泣

題所翁雙龍戲珠圖

黑雲湧海雷破山兩龍出沒煙波間不思崇朝雨天下  
一珠為戲何癡頑所翁何處得此態三生海賈知妖姦

澤能及物尚乃爾蛇蝎豺狼虎豹磨牙吮血口舌宜瀾  
翻

詛桑葉蟲

有蟲偁行名步屈有蟲夜飛名黑蛛二蟲有吮食桑葉  
綠雲一掃成枯株朝才掩撲暮復盛感化生殖乃爾殊  
嗚呼天將祐凶物繁衍不許人力除密雲搏空不為雨  
爍爍旱火燒八區蠶生無食滿筐筥農人倚杖空咨吁  
公家蠶絲不易辦奚憂夜臘砭肌膚里胥臨門急星火



天網何地能逃遁蓬蒿荆棘不一食何獨茲木多甘腴  
我行聞是言舉手招田夫語汝造物理呪詛良跡迂桃  
將槁斃出桃虱瓜當爛熟生蟲蛆麥米到陳腐變化蟲  
百軀人生元氣衰九蟲來乘虛國家紀綱壞肘腋生姦  
諛有感那相應起伏隨機樞慎勿增怨歎二蟲素冥愚  
崔珏戮猛虎昌黎驅鱷魚異政能幾人熱中徒憂虞聖  
代新來下恩詔已賜今歲疲民蘇

寄何中丞馬侍御

取人以言已非法言亦見廢將何從正如茂林集烏鳥  
紛紛誰辯雌與雄於今憲臺議最公鏡明妍醜難為容  
一職得人百城治湯火息焰冰雪風

田師孟寄紙索鄙俚以此寄贈

河魚腹疾今兩冬閉門罕與人相從寄紙千里索鄙俚  
中心慙慙成衰慵往時馮婦善搏虎邇來袖手哀龍鍾  
重遺雅意覓塵蔭醬瓿一覆無遺蹤古人立言至不苟  
要與天地傳無終德厚才雄出新意格言字字開盲聾

正如造物氣塊北吹噓萬物紛青紅豈同世儒尚剽竊  
抽籬徙壁西補東老來細嚼羣聖言愈覺造語難為工  
好名苦心續六經至今識者非王通昌黎老筆不作史  
自視難與春秋同今人下筆千萬字屋下架屋何重重  
有心作文已差謬聖門正學殊無功誠身治人兩無用  
道聽途說誇辭鋒不知中表自矛盾著書滿屋將何庸  
偶臨細事毛髮比汗顏血指招災凶斯文掃地何乃爾  
千載誰復悲麟窮

至元壬午秋旱米湧貴人絕食禁糜黍作酒因

以除酒課焉喜為之賦詩

漢武窮兵權酒酤糜穀漸多非法古後王踵習以為常  
藉酒豐財成典故歲增月辦程式嚴億兆門門為酒戶  
賢愚中酒得愆尤論法從輕歸過誤居官嗜酒日醺酣  
田畝銜盃廢農務竹林七賢稱達士開元八仙爭效慕  
士風放曠亦如是四海巫風了晨暮一篇酒誥誰復讀  
予醉父前從嘖吐今年秋旱人絕糧酒禁申明嚴律度

外方郡縣內京畿不見青帘蔽街路殷周善政今復行  
萬事冥冥有無數臣鄰士庶總醒醒禮法從今敢移步

和王誠甫村居韻

桑柘陰連桃李樹人在翠微山下住水光林影讀書堂  
夢裏相尋時一去瘠磽莫厭山田荒不隨蟻穴蜂衙忙  
丈夫出處豈徒爾隣野何慙綠野堂

糊窻感懷

六月開軒驅溽暑八月糊窻障風露暑寒相承一何速

過眼春冬如旦暮人生得歲數十週直與無窮鬪馳騖  
焉知氣數不可逃以力勝天矜智慮每將得失較賢愚  
一片驚心亂無緒藏金鄙屋未厭多八百胡椒更貪慕  
我生天稟鈍且愚紛閨羣雄事貴富偶為饑寒驅入官  
情味脩然一儒素有子已課學力農不才恐被功名悞  
四年京師觀物變造物戲人今乃悟安得心閒日月長  
桑麻鷄犬江村路

徐熙桃花牡丹圖

武陵溪頭千樹花和風麗日蒸朝霞洛陽花品成譜帙  
魏紫色香居第一徐熙僭竊東君職曉日未晞風露濕  
融融穀雨三月天愛花得花長眼前錦囊玉軸莫漫開  
恐引舞蝶游蜂來

跋石曼卿古檜詩卷

辭希少陵古柏行字畫遠過歐率更玉鸞未返芙蓉城  
氣豪得酒河漢傾虬蟬擾擾京塵腥世門兒女宜多驚  
後人有口能題評神游八表君有靈拊掌一笑蒼蠅鳴

中統季春二十八日雨

亢陽不雨陽絕陰雨而不止名曰靈五日之禾十日麥  
過時而雨非甘霖始知天地至和之氣一乖戾咎徵凶  
歲隨相尋古之哲王賢輔洞究造物理是以財成輔相  
調燮贊助蚤暮承天心六氣少差繆責已憂思深政平  
訟理無失德歲豐時和神亦歆此道昧已久上帝誰汝  
臨旱乾水溢竟誰恤可憐閭里空呻吟皇帝二載春夏  
交期雨而雨無差淫出聞田野語點滴勝萬金書生習



氣馳寓說賡歌高和農人舌  
蠶蠶成絲有餘業萬里黃  
雲食新麥

題古木寒鵲圖

鵲能傳喜誠鄙俚每聞鵲聲亦傾耳  
不知飛從何處來  
古鳥依人良可喜畫工下筆能悅人  
羣鵲集林驚不起  
飛鳴行啄各有態烏衣縞袂晨光裏  
已宜怪石倚高樹  
更着脩篁照寒水荒寒雅淡真幽趣  
洗眼明牕仍靜几  
不羨豪家錦翠屏金鳳碧梧誇綺美  
看到子孫能有幾

天寧寺雨

七月九日申時雨作終夜不止十日又未止至午方息

周歲雨澤有定數春少秋多相倍償今年春夏極乾旱  
滋養妖孽成螟蝗中使捕蝗星火急一日便欲除災殃  
入秋以來大宜雨片雲尺澤何淋浪壠畝透陷不可入  
晚禾坐視成蕪荒深溝巨壑水溢滿官路白浪流湯湯  
嘗聞驟雨不終日胡為此雨特異常飄風驅雲九州晦  
雷霆霹靂飛電光須臾庭階水三尺簷溜射日垂銀槍  
連宵繼晷尚未止時聞砵轟摧壞墻妖蝗得雨愈不死

躍躍似欲忻新涼役夫無術可撲滅四體雨立塵沾裳  
安得西風斂雲霽死與蝗鬪無憾傷

題未央宮瓦硯

歷下趙明叔家藏

阿房三月火才滅未央凌霄聳雙闕漢開賢相一鄼侯  
反踵亡秦遵覆轍且令後世無以加飛馬可能追逝舌  
中興積甲能耳齊不救觚稜成毀裂風吹片瓦落人間  
俯伴墨卿磨歲月鉛華百鍊烟若新玄壁團團疑積鐵  
憶初創物心而豈為此設要同藻井覆冕旒孰向寒牕

映方冊昔隨金碧生五雲今奉松煤入溜湮椒壁承香  
夢一空癡聽癯儒坐嗚咽不幸而幸應自知却閱繁華  
幾銷歇千年不墮劫火灰更要堅剛全晚節人生百年  
未死前貴賤升沉幾窮達為馬為牛儘世呼躍冶索名  
徒自孽偶因感物數興亡漫與成詩忘鄙拙

輓北山先生平浩然

曉書無若韓昌黎高閑一序豈我欺古今評書當盡廢  
就有作者皆蕪辭少時誦讀亦少味年來到眼不忍離

勞心點畫何土苴效顰學步真奴隨法雖不足意自得  
何害平直連傾歆文章更使似人面億萬不類尤新奇  
古人學書欲自適妍醜初不求人知千金一字不苟售  
碑榜挂名何足為有時酣醺興寄發酒牆茶壁皆淋漓  
顛張醉素兩寂寞千載誰復同襟期北山先生得書法  
卷軸屏幃生光輝早與閑閑幕賓列他人諾諾了不增  
毫釐

題濟寧張仲祥家藏李龍眠賀蘭仙人圖

賀蘭仙人玉為骨畫工如山畫不出乘風御氣來人間  
擾擾雞羣立霜鵠龍眠居士亦天人謫墜瓊林厭凡俗  
晴窗弄筆一寫真八表神游落長幅手持金錢悟羣愚  
長笛筠籃跣雙足鬢髮飄蕭海氣涼麻衣色染三山綠  
斯人有無世莫知何時邂逅相追逐月明清夜玉堂空  
談屑珠璣三萬斛

題廉宣仲古栢寒泉圖

醫學雙教  
授家藏

千年偃蹇冰雪姿坐與泉石廟歲時歲寒不彫春不滋

百草雨露惡能私深巖窮谷世莫知九楹重任無所施  
幽人靜觀費夢思盤根九地不可移閒窻弄筆摹寫之  
但恐軟美沒嚴儀龍蹲鐵脊虎奮髭半夜山鬼聲呖些  
趙昌徐熙乃嬰兒斂衽縮手不敢窺寫真唾我瓊瑰辭  
題王黃華所畫江山遠意圖

揚休山立真天人西來觀光作王賓俯招一第若拾芥  
文詞爛漫瓊瑰新玉堂東觀本固有自任之重初不專虛  
文愛君直欲到堯舜言切豈慮櫻逆鱗謫官拜官總么麼

但恨所學無所伸太行首尾八千里黃華一山雄且深

按大典內此句下有脫文今無別本可校謹仍其舊

清潤中表無纖塵與山作主

寄深隱結茅南臥西山雲十年不入相州市蜂衙蟻穴  
從紛紛山光慰眼無以報醉墨聊與山寫真千巖萬壑  
不可盡形狀數峰遠意生雲林草鞋脫却臨水坐隔溪  
籬落巢由隣當時所遇亦不惡壯年胡為甘隱淪由來  
志士本為濟時出斯道一屈區區文繡安足纏其身

觀金工婁振之小銅盒十八學士夜宴圖



吾鄉異人婁振之金工絕藝冠一時大錢園徑方寸許  
十八學士軒鬚看軒楹僕馬映花竹層見疊出紛芒絲  
不徒纖微具形體三生夢破龍眠師專門神巧思一見  
落手把翫堪嗟咨畫師筆力不到處神饒鬼刻全天姿  
斯人曾次老禪伯一芥端可藏須彌寓言蝸角隱蠻觸  
按圖却恐非虛辭人生大抵好誇誕內不自足求人知  
畫蛇信手不自笑先師老眼寬百圍却因謹細悟為學  
放言大筆皆癡兒

跋蘇黃米三賢帖

宋朝字學蘇黃米鼎峙誰能加譽毀精意揮毫各不同  
伯夷伊尹柳下惠後人愛憎從所好直以剛強勝妍媚  
我于三賢之所長不學庸工專一藝或真或行或奔趨  
喜怒悲歡隨興寄人心秀發寧有限一氣敷分生萬異  
洪纖高下總成文正似前賢為墨戲

題赤壁圖

雪堂曾中十萬兵西戎東遼何足平用違所長計已失

黃州一貶良無情才長定為衆所忌直詞更敢相譏評  
霜寒木落江水清茫然萬頃江月明扣舷釀酒不一醉  
感激俊氣懷羣英千歲一合豈易得老鶴孰與雞爭鳴  
不須遙想周公瑾只合移文酹賈生

送王僉事之任宿州

有面不作貧賤顏有淚不洒離別間百年無入不自得  
口耳未省聞長嘆此別不免數日惡不為衰老傷肺肝  
嗟君壯志不苟就曾次萬仞崔嵬山辭尊居卑作吏隱

丈夫所懼非饑寒州郡之勞困奔走風塵車馬同癡頑  
人生才術非一致心能平易無危難只今疲民困貪暴  
我能廉靜民自安上官見憐寬指嗟三年卧治容優閒  
上計考功天下最別有大拜催歸鞍

有感

高堂銀燭明如晝半醉玉山扶翠袖生來不讀一行書  
閱閱遙遙出華胄畫樓笙簫秋月明美人促席嫌張燈  
主家愛客欲達旦歡呼戲狎皆絕纓書生賦分何良苦

寒夜風聲虛飛舞爐灰火滅無膏油不才胡可干明主  
道行道塞皆在天賤非愚魯貴非賢勿因偶遇由力學  
車武匡衡更可憐

登車行贈送陳按察

古人疾惡如疾讎攫鱗辯折不自謀今人附勢忘怨仇  
合迎媚嫵觀者羞頽隳委靡潰不收茲時孰與分薰蕕  
乾坤正氣豈絕休張綱范滂今有儔慨然再挾千年輜  
英氣攬轡橫清秋一洗豺虎消百憂畏首畏尾繞指柔

浹背赧汗沾衣流姦邪富貴到白頭何如剛直卧巖丘  
登車行去悠悠排邪獲罪非所愁卯翼山東四百州

題顏太師墨迹

太師魯公忠義筆石刻重摹尚珍惜太師蓋棺六百年  
清節照人如昨日平生想像望風采生不並時那可得  
今晨異事非偶然盥手焚香拜真迹拜君心畫憶前事  
掩卷罷觀三嘆息河北名郡二十四遠識誰知復城壁  
當時豈無匡時言太平天子方驕佚兩京流血蜀道難

僥倖中興豈人力老臣如公能幾人凜節四朝持一德  
杞賊姦邪四海知戲謾庸主排忠直自古如絃死道邊  
不覺歌詩淚沾臆

至厯下憶子勉運使

故人策鞭來東方五年千里遙相望今年以事走歷下  
又與故人成參商吁嗟不覩故人面惟有碑榜留文章  
心聲心畫得一見恍如把臂臨清光人生能消幾迴別  
再會各憐鬢滿霜始知宦游情味惡半生萍梗何奔忙

誰能強健得告老杖屨鄉里閒徜徉

趙禹卿匏瓜齋詩

君不見玉盃瓊斚黃金瓶玳甌象筋烏銀罌翠屏鈿几  
奪眼明如意醉擊珊瑚莖一朝奴輩利財貨所寶適為  
他人營又不見昨日見逐今客鄉高簷危棟連飛甍方  
花古礎排七楹門楣大榜書佳稱繡衣絲履雜簪纓寶  
鞍朱鬣光照庭夜半大厲瞰門扃黃犬追嘆嗟虛鳴汚  
宮牆室竟何有但見腐草飛流螢羨君閱世能自寧急



飛勇退韝脫鷹紛華美麗鴻毛輕高齋命以匏瓜名卮  
匱隨形各天成枵然酒盡壺自傾不將不迎來佳朋醉  
者自醉醒者醒去城十里上馬到蕭然遠隔塵泥腥盤  
谷圖序書座右歸去來辭為東銘春課兒孫多種木秋  
催童僕更深耕一瓢陶然時自適高秋擊壤樂昇平西  
山罨畫雲間橫

題醫者王庭訓素軒詩

素軒與予少平昔李侯

德常

攜紙來徵詩端人取友慎許

可敢以不敏三致辭一篇黃帝書萬世醫者師素軒世  
醫業研究心孜孜尚友啓元子每恨不同時要當論難  
立新說一字廢睡終夜思學醫到如此人命誠所司乾  
坤造物或失中力與六氣調安危病來聞問識源委器  
使百藥如家兒古今方論充棟宇曲蹊方徑非所知當  
年有無上池水徒駭視聽誇神奇人生寧可食無肉不  
可一日無良醫節食服藥最我老來事安得移家相近  
朝暮相追隨

哀饑民

天災流行孰可禦水災何如旱災苦秋旱十日已成災  
自夏窮秋天不雨細民安敢厭藜藿穀菜無苗盡焦土  
誰能一日不再食火濕寒泉釜空煮義倉虛名固無用  
所費不貲無寸補天下常平幾萬間公廩空殿走饑鼠  
千家一室粗儲畜亦豈有餘供貸舉山家入山收橡實  
不避林深遇熊虎平野村村食榆槐寒滑那能辭腫吐  
樹求葉實草尋根男執斧斤婦筐筥不憂湧貴憂無糴

俗吏區區定時估一年凶荒遽如此再歲何方逃死所  
牧民誰作父母官尚惜一言申省府前催和糴後催糧  
流殍遺民今幾戶邇來馬牛皆半價芻豆俱無難作主  
何時斗米復三錢山積陳陳到紅腐

息軒畫馬圖

息軒筆端生萬象羣馬一幅尤神奇初疑天寶汧隴地  
無乃漢家金粟堆騰驤飲啗各異態矯矯虎脊追龍媒  
雲煙慘淡水清淺渥注髣髴臨天池天然閒適發神駿

不比伏櫪困銜羈牧兒乘高喜蕃息長風剪剪吹貂旗  
先生房夢奪宿魄曹霸韓幹安足希秋山春水從天仗  
慣賦宣王考牧詩書生駑鈍例衰懶一馬欵段仍疲羸  
開圖愛玩不忍舍壯心感激將飛馳西極南荒未治化  
自憐黽勉持毛錐豈知吾謀適不用棘門霸上真兒嬉  
安得此馬二十萬立縛兩主趨丹墀

因巡按至長清縣聞事自警

中年以前月生光中年以後月光缺年登五十無所聞

聖教難施宜見絕我生倏忽壽六秩悔悟前非生內熱  
氣血雖衰志不衰鍊事精炎心似鐵所求得路耳順成  
人十能之我千百正如行人能涉獵省悟迷途改前轍  
去非從是易為功聲入心通自澄澈

貞婦救夫殺虎圖

生民之天君父夫不幸構難當捐軀壯哉野婦非知書  
救夫剛膽鐵不如正氣吞虎如狸狐精誠動天虎伏誅  
劍光怒髮衝雲衢英烈一日聲八區夫喜復讐言三日蘇

義士擊節成畫圖世復祖稅光門閭照映史冊激懦愚  
死節忠愛羞遲徐我朝人倫厚有餘殺身成仁匪干譽  
當熊馮媛無時無四門穆穆雲日舒祥麟瑞鳳生郊墟  
吏無苛政傷惇孤

題右軍書扇圖

中興有才無不許英氣橫空無着處會稽山水足閒曠  
萬竹青青照庭戶東山謝公亦高人一起未易湔塵土  
蘭亭佳序寫幽懷殷浩何人知肺腑閒牕弄筆作游戲

虎躍龍騰走風雨高情已自過鍾張戲以百錢驚老姥  
當時墨妙墮渺茫畫圖想像開襟宇字字精嚴豈偶然  
至今池水元雲吐長才偉器百未施直以書名垂萬古

題杜君復家藏王黃華雪梅圖

玉堂仙人飽玉食倚風咳唾成珠璧散花天女不敢前  
瓊室瑤階衆香國却嫌太素苦清寒試手春風開玉粒  
欲書不書持醉筆抹畫冰綃三萬匹月明蓬萊水清淺  
偃亞寒梢幾千尺玄冥退席驚竒特揮斥冰花蒙玉質



羅浮窗戶愧庸俗江妃籬落羞寒乞趙昌徐熙塵土人  
辦與凡花逞顏色仙人飛升今幾秋高氣清香尚蒸濕  
人間寶墨有如此錦囊玉軸加珍惜幽人不見林西湖  
誰有新詩能破得九原喚起花光僧茗椀分香照濃碧  
展卷相看洗塵臆

題婁叅議詩樹

得名詩樹有二說為君注解在所擇作詩要使主意明  
根幹枝梢到花葉意明辭精興寄高一樹瓊瑤萬花發

漫無命脉百千韻敗葉飄零誰總攝正如富人號錢樹  
亂落分飛空瑣屑半山老人選唐詩一集百篇存一絕  
詩律貴工不貴多無使黃金雜銅鐵一聯一詠堪諷詠  
傳世誰能捫衆舌我言相敬不相欺深叩草堂當得法

過王彥章墓

墓在汶  
上城西

虎臣剛中膽如鐵臨敵誓天甘死節梁室存亡係此身  
鐵鎗可折心不折朱溫父子自梟獍可憐力盡忠貞血  
五季君臣真傳郵假威視勢懷攘竊癡頑無恥馮瀛王

更夫易主同娼妾汶陽城西一丘土起予凜凜衝冠髮  
豹死留皮皮可朽人死留名名不滅威武那能屈壯懷  
至死名呼邈佶烈

寄馬德昌

遺安堂深有餘慶瑞世皇皇生五鳳文章官業兩崢嶸  
庸懦聞風亦飛動丈夫墮地豈偶然白璧黃金宜自重  
南風過雁得新詩字字鏗鏘堪詠諷想當談笑了官事  
高齋坐受雲山供一時交友盡豪傑萬象無聲自嘲弄

一江風月酒滿船世無謫仙誰與共大鵬扶搖九萬里  
斥鷃蓬蒿莫攀奉人生難忘父母邦何時定作還鄉夢

題楊秘監畫裴晉公探梅圖

晉公貌不踰中人有唐輕重係一身四朝顧命二十載  
千瘡萬孔俱彌綸功成不有若無事別業徜徉洛水濱  
四夷致問民戴慕祝公遐壽踰千春一游一宴入傳詠  
到今陳迹猶如新息軒尚友志不淺思公恨不同朝紳  
探梅故事作橫幅堂開綠野延佳賓招之不來白少傅

歸舟觸碎波心雲美人清唱梅花曲雪寒四座迴春溫  
淮蔡誅夷太平後此樂未足酬公勲畫圖宜為什襲珍  
望之威重不敢親儼儼元和社稷臣

鹿庵所藏戟枝峯詩

鹿庵几石名戟枝金碧焰焰騰光輝前峰巖巖東魯聖  
楊休玉立冠嵯巍後峰具體顏氏子拱手接武相追隨  
元氣純全入涵蓄詎如高士軒鬚眉世人愛山徒悅目  
千巖萬竅誇新奇何如茲山不纖巧氣象直與恒華齊

奇章甲乙固多品以志徇物何足規先生玩理不玩物  
岱山同此石一窺筠窻書几靜相對聳出物表無凡姿  
雲煙朝暮從萬變怡然坐對忘朝飢

題儲天章菊軒詩

揚州紅藥扶桑日香滿人間照天赤洛陽瓊英萬蝴蝶  
舞破霓裳羽衣白金盤一本直萬錢貴戚走馬爭後先  
珠簾玉堦春晝長不煩纖手送瑤觴噴吐奇麗難再得  
弗念傾城與傾國奚須明眸映皓齒花妖醉人乃如此

花中愛菊能幾人悠然公去無後身一盃坐對南山意  
直到儲侯知此味

題田御史集瑞堂

高明之家鬼瞰室瀟然一堂羣瑞集無情草木寧有知  
和氣薰蒸昭令德散滿雲窻月戶香一日嘉聲徹京國  
古人視履考貞祥誰謂前途黑如漆一篇嗟哉董生行  
不愧昌黎五色筆南鄰金珠塞華屋北里朱輪照金戟  
無德而祿殃必酬火齊鞭口嗟何及後人勿廢前人光

子孫世世其逢吉

輓許左丞魯齋

憶昔朝廷求直言奇謨偉畫爭後先對病之藥不易得  
大策與衆殊相懸不從事事論得失清流莫若先澄源  
曰心曰性開聖學敷陳詳悉登經筵惟先格王正厥事  
此心一片金石堅當年羣儒那解此迂濶譏議何綿綿  
陶鈞高士惜未遂沁南養疾桑麻田聖情虛佇待可起  
台星頓減清光圓從今大政向誰問賴有遺藁留長編



慶嗣能得雄

嗣能茂異鬚欲絲著書五車需一兒今年釋褐作教官  
得雄佳應相追隨故人侍御送詩賀勸勿過愛宜寒飢  
友朋相愛恐衰暮仁必有後何憂遲鳳雛驥子自有種  
英氣已見浮修眉要於激怒聽聲響欲乳不與令號啼  
傳家嗣續豈細事奚止翁媪相娛嬉詵詵繩繩自茲始  
桑弧蓬矢歲歲懸門楣

過平原

天寶之政何淫昏卵翼蛇虺無遺恩逆情已露穢已聞  
寵錫兵柄開函門兩京流血塗帝閭二十四郡同潰奔  
孤城獨有顏平原鐵腸不撓樓櫓存人心倚公不披紛  
池深如海城切雲羯羶惡念終日焚酸辛西來迎兩君  
老波一瀉長河翻四朝苦節德益尊賊臣姦舌孰可捫  
假手凶逆誅耆勲太師恩禮何虛文九江不洗忠血痕  
到今節士哀聲吞青天白日照忠魂雉堞是非餘短垣  
野烟村樹如荒村一廟血食誰與論扁題高義張吾軍

一洗萬古鳴皋羣

題三蘇翰墨

眉山巖巖挾雙峰西南陋邦豈能容地軸左轉來向東  
直與太華爭尊雄英偉驚倒六一翁京師多士為一空  
望塵羅拜趨下風姓名即日徹帝聰談屑散作香霧濛  
文章爛漫如長虹帝堯堂下添夔龍聖賢千載一相逢  
三更送歸蓮燭紅當時相業雖未終辯姦諸論萬世公  
遺墨一字摧羣兇

過徂徠山

謫仙乘龍去不還  
白雲空鎖徂徠山  
當年咳唾落巖壑  
至今澗草如幽蘭  
玉堂金鑾不伸肘  
醉游萬里天風寒  
古風六十配風雅  
一唱一嘆清肺肝  
傳芳再得石守道  
正氣高壓青雲端  
慶厯一詩無敢作  
表章忠正誅妖奸  
茲山自從得二賢  
拄天萬仞青琅玕  
書生朽骨億萬萬  
名與秋草隨霜殘  
乾坤清氣我不與  
坐長白髮凋朱顏  
一言蓋世不能辨  
自笑生死文字間  
王事有程前路永

西風落日催歸鞍讀書堂基杳何許濯纓山下溪潺潺  
題石曼卿草聖

烈風急雨驚四溟雷轟電掣神鬼驚萬字一息筆不停  
九天銀漢為一傾醉呼張旭不敢應雄詞傑句江海聲  
脚蹴俗扎慕蘭亭劉潜佐酒飛巨觥百尺樓高北斗橫  
人傳二仙臨帝京百年厭世還青冥白雲何處芙蓉城  
燕城中秋

白露橫空洗秋碧清輝溢地升飛壁滿襟沆瀣消塵臆

入地水光寒不濕孤客天涯有今夕惜無玉笋橫長笛  
百年好月不易得忍使流光駒過隙謫仙百盃盈一息  
庾樓去天不盈尺二賢高遠能自適西風回首成陳迹  
前我好月歲千億後我有月無終極人生此身非金石  
一刻千金良可惜古人誰得今誰失後人視今今視昔  
毋言酒石金幾直焔焔東天海波赤

贈按察慶甫陳侯

昔聞東原號殷庶五十四城桑柘土一朝被檄入城闔

見與所聞何謬誤街衢十室九茅茨雨夜霜晨悲破露  
入雲高第十餘區金碧崔嵬鎖煙霧野人君子同有分  
奉養相懸太踰度勢如豪貴三數人丐餓百千為從御  
茲時四海總同風急斂暴征那計數淫荒凶醜恣我為  
愛憎生殺夫誰懼天將悔禍良不難煌煌曉日開雲路  
貪者廢削强者誅立與貧冤除巨蠹陳侯按察來東方  
攬轡澄清酬所負豺狼辟易肝膽寒狐狸奔竄愁僵仆  
單府高懸一鏡明市獄何須求細故州縣追胥不下村

荒遠農家無外戶坐令懸磬積困倉齊紈魯縞如山阜  
三年諸道細論功籍籍何能脫朝譽攀轅卧轍恐難留  
佇看催徵廟堂去



欽定四庫全書

紫山大全集卷五

元 胡祇遹 撰

五言律詩

寄李參政

屢辱哀憐語情親意有餘但知深刻骨非敢吝裁書委  
順仍何怨奔趨誓不居愧非鵬鷃翼風力費吹噓

自憐疎且慙與世每差池敢起連茹念空勞薦鷃辭材  
凡慚祿厚德薄稱官卑碌碌隨人後衰髯盡欲絲

三載陪清論愚復訂頑雲泥隔霄壤胃臆塞茅管寒  
阻涂陽雁塵昏薊北山憑高一舒眺望眼不能還

定交十稔久省幕二年同從政多迷路推誠賴發蒙蘭  
蓀正輝映萍梗忽西東此別何多感心交不易逢

四海皆交友心期定孰親佞柔恒接踵直諒杳無人勢  
利偶相合戈矛暗自新從茲送君去此道向誰陳

郎中辭省幕大尹拜河中渡晚鐵牛壯樓無鸛鵲雄士  
封猶晉鄙民俗挾秦風表裏河山地雍容見詔功

世祿名家後千門不一存箕裘那復繼豺虎共趨奔奮  
袂塵囂外持身道義尊漢朝楊太尉千載有賢孫

送客都門道傷離不忍歌無端成遠別更覺愴春和匪  
我私心重憐君正氣多從今清苦影獨立障狂波

府尹固當選朝官豈易求苟循銓調法翻失重輕憂去  
去知民瘼寥寥乏廟謀却教刀筆吏啟沃贊皇猷

我豈兒孫淚已別復牽衣重為朝廷惜還傷徒侶稀勁  
強工媚合瘦軟學依違所感良由此行軒去似飛

寄李參政

并序

時禁廢絕書呈負罪負罪然傾嚮思見之情與夫  
鬱抑欲訴之懷不得施於語言文字日增愧悶  
來敬審鈞履安佳且辱念問索鄙言感慰何極  
不肖平日凡作俚語以其自滿意得紙起草過  
則隨手棄去無復紀錄尚何足記憶實無以奉  
君命感念閣下過愛之厚得鄙詩七章奉為違  
遠三年千

里一粲

過愛何慙厚，伴來索鄙言。書呈慙闊畧，問念到寒暄。公  
退衡門晚，旬休人事繁。庸駑脫塵鞅，無力逞騰騫。

叨從地官列，承接有餘歡。鵬鷖分飛後，雲泥會合難。非  
才宜速謗，違衆豈容安。會有登龍日，清燈語夜闌。

名位非難得，風期恨寡同。交情誠款密，官事付雍容。社  
促南飛燕，霜催北去鴻。如何巧相避，相背不相從。

時事無堪說，羈懷欲訴難。不才勞憶問，鈞履喜平安。誠  
意如金石，情言出肺肝。人回無報祝，為國老加餐。

日月嗟逾邁西風又再秋鴈橫寒水磧人倚夕陽樓塵  
坌埋佳况河山阻勝遊傳聞好賓主雅集日相酬

四海經綸手胡為宰一方帝心良有在物議不須忙蕭  
相初當國曹參未治裝終當復台鼎談笑濟時康

著述慙先廢勲功竟不前持身誰見信顧影自空憐華  
髮老逾壯苦心窮益堅辱蒙時寄問千里慰淒然

慶李侍郎母七十壽

并序

天地人通為一氣順之則吉而莫徵於孝感冠百

行基萬善充之則可以為堯舜而德莫大於孝禮  
部侍郎真定李侯敬甫事太夫人以孝聞至元辛  
巳慈闈壽七十視明聽聰福履康強自翰林臺閣  
京師賢大夫外及諸郡一時名筆鉅公咸作歌詩  
以慶不肖與敬甫三十年之交以遠處側陋既不  
獲升堂拜賀而能無一言謹同彰德諸儒士摠誠  
吐辭別為一軸仰祝千歲以申嘏頌之意云爾武  
安胡某頓首再拜

貴賤誰無母慈賢貴一時德馨浮鼎食壽域啟庭闈九  
族傳家範諸姑慕壺儀宜能服羣彥遠近送歌詩

慈孝天垂報萱春七秩開壽盃承桂玉子執萃賢才市  
飯嗟陶母斑衣笑老萊至誠能錫類相戒詠南陔

富貴誠難得多貽父母憂守身無愧怍養志樂優游意  
廣常丹頰眉龐尚黑頭滿庭和氣裏日月為遲留

甲剪金猊暖銀臺蠟炬紅歡聲動閭里瑞靄上簾櫳先  
志求多喜承顏恐失喪一盃千歲酒此樂更何窮



仙李蟠根大孫枝慶有餘稱觴堂下拜神錫掌中珠

敬甫

四十七無子太夫人  
明日慶七旬夜得孫

孝感來奇福史官當特書十年開

八秩鴈鴈看懸弧

捧檄情何切陳情志亦高前人固麟鳳獨我豈蓬蒿  
頃刻違甘旨中心積鬱陶慈顏常悅豫萬事等秋毫

高年何最喜七十得飴孫既足延遐算終當大慶門  
錦綉珠絡慶慈語喜顏溫人子除茲樂浮雲何足論

春滿百花堂人知孝義坊途歌知詠德里語解成章薄

俗皆歸厚詩人發興長佳名等滄水千古並汪洋

老我無詩思因君重起予堪歌德如玉恨不唾成珠禮  
闕升堂拜情隨贊美舒何年旌宅里疏請在宏儒

趙博州九十壽

忽忽浮生裏誰能九十身風雲惟有夢部曲總無人麟  
閣圖形舊農書到手頻翛然坐終日萬象與同春

壽姚相

六載持鈞轄經綸百慮新退公恒過午假寐欠方晨眷

注尊者德諮諏屬老臣年年黃閣外長見駐朱輪

蕭爽江湖質忠貞社稷臣一言能及物萬象暖回春宋  
璟文逾媚曹參酒更醇太平勲業盛歲歲賀茲晨

異政疑難決須公出片言問牛能及馬見委已知源量  
雅能持重才雄不厭繁誰知清鏡雪黽勉為宸恩

廣平巨族劉彥深三弟曰彥平彥元彥清事母

孝至元壬午壽八十自府主以次皆作歌詩

以慶武安在廣平為屬縣有此盛事鄙懷不

勝歡忭謹作五言四韻并序數語以冠其端  
大孝天垂報萱堂八十春笑談追往事步履隨人四  
子華筵盛羣英慶語新高門何最喜賢母出忠臣

上司馬父八十壽

誰人無壽席茲席冠清時尊竿京師酒絃歌翰苑詩孝  
心榮樂養丹頰拜顏慈坐閱三槐影晴雲百畝垂  
閱世日云幾六龍三萬周無儔思往事燕處憶前修益  
壯推耆德通尊埒素侯守神能獨立歲月任遲留

養老明時事逢時有幾人入朝容把杖賜膳得常珍右  
學尊殊位深衣穩稱身竚看行是典何計謝蒲輪

高年時亦有晚景少康強聰聽聲傳谷司明漆點光花  
時能散步月夜喜持觴福履何勞卜前途萬里長

純孝心何在多端務悅親平居恒上壽况復值茲晨厚  
列千壺酒思招萬里賓喜隨名筆後例作上詩人

閱徧人間世虛心保歲年掛冠連棄譜掩卷坐忘筌酒  
勸高晨起茶醒過午眠怡然天爵貴不作渭濱畋

怪與常人異由來間氣生年齡入高邁神識愈清明安  
處中和奧那知寵辱驚生飴甘旨奉几杖瑞升平

慶門論第一王父福何完三嗣朱聯紫羣孫玉映蘭天  
倫叢順德庭宇足真歡綿算隨心思汪洋萬里寬

鄉飲誰多豆先生五福尊有方留白日無夢上青雲謙  
抑將迎捷雍容笑語溫憶常圖畫見龜鶴繞鑪薰

內稟鍾仁靜靈臺壽域開本基先自異寒暑不能催執  
友邀黃髮斑衣進老萊閒情舒孝養甲子看重迴

寄耿壽之

每每思交友時時屢上心  
俊才能虎受哀鬚雪霜侵  
烜赫馳聲遠經綸蓄思深  
朝賢如有問腰沈不勝金

寄李敬甫劉漢卿陳取新

歷歷思羣彥才如照夜珠  
走盤光不定鑑物燭難逾  
碧海三秋翼青雲萬里途  
故人汾水上白髮一癯儒

寄樂用之

別後常相憶秋風又颭然  
人來三致問歲半兩榮遷  
共

望山公啓羣推文舉賢只今世契分禮合重同年

寄子初

拜狀慙疎闊懷思未少忘既能同好尚寧有異行藏老  
喜心懷靜閒知日月長氣和消百疾此藥最為良

寄韓通甫君美昆仲暨禹卿參卿

僻處西南遠音書久不通去春傷作別今歲又將終矯  
矯皇都彥栖栖白髮翁東郊復南陌杖履幾時同

別離驚再歲一日未嘗忘每每將情達匆匆以事妨簡



書防抵律韻語不成章千里幽并月流光共一觴  
事塵埋猥賤展轉憶高人家在京師裏身如江海濱幽  
園隨意廣佳酒逐時新猶有塵緣在時汙席上珍

寄子勉

儒術飾吏事精粗不相妨却笑料生拙翻為案牘忙豈  
知拋土苴已足致平康坐使刑名子喧闐政事堂

寄贈耿壽之

從韓廣道  
之索也

傾蓋猶如故同朝十載餘邇來聞福履重喜拜佳除庶

類勞經濟通才看卷舒去人韓廣道幕客李尚書

幕客一作

履倒

寄高聖舉劉漢卿

外補求清簡那知益賤繁省評甘指嗾部介亦趨奔百  
務如星火千憂入夢魂塵顏將俗狀卑辱不堪論

寄王經界彥才

齒髮臨衰境參商又七年思君常耿耿念我計懸懸老  
覺親朋寡閒驚歲月遷從今相慰意莫厭尺書傳

寄齊彥

俸止凡四月囊空無一錢清霜寒似水老屋夜如年卧  
睡翻書冊迎暄坐馬韉何時辱相過一粲賦蕭然

趙氏冰凝雙井茶

香新出羣品題來名亦清玉纖分鳳餅檀頰襲蘭英幽  
潔澄詩律高嚴挫酒兵席中相對語佳思愈難名

咽臆厭膏粱何人薦此香玉池方潤溢心思已清涼句  
嚼澄江練懷忘飽睡鄉野哉盧老子七碗攪枯腸

慶楊飛卿母八十

母賢兒立業兒孝母長年有感那無應相成定不偏三  
千難擅美百行孰爭先一代題詩什名應萬古傳

夢巖祖母八十

苦節幹夫盡慈顏備母儀行無纖芥愧壽合百年期鳳  
啄爐煙細萱堦晝晷遲清歡那有極庭樹亦熙熙

純孝傳家遠高年壽北堂拜斟瓊液滑起舞綵衣香醉  
頰蒸霞潤雙瞳點漆光異時旌善詔看走繡衣郎

厚福人多備誰如孝養榮簪纓連綺席蘭玉照堦庭徹  
請曾參酒恩分類叔羹無煩歌上壽剩有八千齡

景邵還家作詩以送道過平陽有懷總管烏侯  
故篇終及焉

絳帳傳經久慈闈入夢頻誨人誠可樂愛日更情親才  
藻千夫俊聲華四海新軒車過平水定作李膺賓

至元五年春始平御史臺起宣慰張公於鎮公  
援引舊典條示同列以老得告還家諸公作

詩以餞之

臺閣推元老何人右我公行藏隨用舍持守見剛中晚  
節尤堪惜前途坦不窮太平方立法珍從看兼隆

寄陳君詳經歷

一別歲三換相望路五千君思漢風土我憶蜀山川料  
敵生奇計論功惜壯年遙知刁斗夜健筆正籌邊

歸雲堂

出岫非無意還山豈偶然空賡蘇旱志俯就潤身權俗

客來無路閒情益自賢杖頭扶不起何害日高眠

寄答衍甫

書問識疎懶交情豈少乖久離生逆詐過愛反多猜我已無官況君應厭旅懷何時故鄉月攜手共徘徊

世契情親定那因貴賤移平生愛君厚此意只天知薦士非無語連茹正爾思詩來再三讀千里一吁噓

陶鑄權誰執區區亦備員渙顏隨衆後負責在人先秩以苞苴進人因口舌賢無窮惆悵事一簡不能傳

卷五  
造請違時好孤高不自伸固宜招謗訕反累及交親飄  
泊猶千里淹留已十春還家近慰意妻子愈能貧

答子勉

半生不家食無物擾剛腸冉冉踰中歲時時念故鄉氣  
衰多感慨才拙懶飛揚却羨農家夕團圞語話長

羈懷何處寫時上仲宣樓落日千山碧長江萬里流煙  
波迷去鳥天際得歸舟欲詠登樓日翻成一笑休

君衣還鄉錦余歌謫楚詞流年如逝水握手定何時舉



白千鍾酒難青兩鬢絲長江寫孤憤滾滾得新詩

誰憐異方客一紙故人書  
懃懃看還讀情親卷復舒  
有時重把翫孤悶暫消除  
霜雁來何晚無由問起居

南遷二千里風土異吾鄉  
十月猶蚊蚋三食盡桂薑  
河魚能洞泄瘡鬼擅炎涼  
所行無茲苦勝於却老方

得衍甫書因以寄復

一別再踰年音聲墮杳然  
書來蒙眷眷心喜失懸懸  
事業紅塵裏情懷白髮邊  
何時洹水上杖屨兩蹁跹

魚鴈音何闊，參商路愈賒。百年能幾別，千里動長嗟。月滿羈懷共，山高望眼遮。所同惟直道，勢利不能斜。

寒歲緣何物，驅人復此來。曾懷固冰雪，顏狀足塵埃。好友恒相遠，歡悰不可開。得書置衣袖，字字若瓊瑰。

河東風土勁，厯下意幽居。花柳春常早，江山畫不如。荷心薦佳酒，泉眼出新魚。著白兩高士，無嫌下澤車。

仲山衍甫

二良友奇才高節一沉下僚一隱於市故篇中及焉

客懷正蕭索，風送古人書。翹渴誠多慰，寒暄愧久疎。異

方嗟老矣寡友念歸歟富貴何時是先人有敝廬

衍甫書中

有不能勇退之語  
甚有愜於余心者

### 答周正平郎中韻

一別忽踰歲時思得好音新詩將厚意隻字抵千金不  
作南陽卧慙為梁父吟京華塵土夢更比向來深

憶昔承先訓於今耳受音勿為三獻玉慎畏四知金異  
俗嗟隨俗長吟復短吟一官蠅驥尾念慮一何深

清唱誰人和行歌自賞音居官良有愧遺後喜無金已

失邯鄲步難從澤畔吟異時公議底謗責與天深

題解州官廨清安堂壁

到今將七紀吾祖此分符細問當時事猶存舊僕夫

止存

一走卒姓裴名寶年八十三矣

故基承踐履老樹記傳呼瞻仰生悲感

神遊會此都

課家僮織席

簞簣雖微物安身用最親乘霜得秋葦變法起新紋斜  
側初無謂端方卒有倫賈生千載遇前問夜將分

象床誠穩密托體藉湘筠人字憎麤俗波紋促細粼溫  
涼宜熟寐瑩滑淨無塵所恨清霜重乘時讓錦茵

縷組湘江竹含風八尺漪紗幃輕穩稱玉枕淨相宜固  
適炎蒸用毋為晝寢迷清涼無俗夢夜氣有箴規

再拜丹書訓深嚴著席銘安舒恒業業反側亦兢兢放  
弛非遐福恭莊得永寧臨終猶易簣百世可師曾

孫子筇杖

筇杖非尤物詩人喜孝心扶持良有感哀謝莫相侵坐

奉慈顏順行隨愛敬深更省承福履玉樹照瓊林

送行人

三百餘年宋長江一葦航不知何境域更敢恃金湯威  
烈雷霆震仁明日月光安南吾內附使節愈皇皇

送韓寶之

更業行儒術何人識此心方膺七品授廉苦十年深我  
恨塵埋玉誰持石試金莫辭山縣小判府有佳音

韓子來辭別裁詩問起居吏風差異否民俗復何如不

恨才無術翻愁智有餘  
好將彈擊手摩撫看舒徐

送韓茂卿

昔汝從余學於今入仕途  
寧為清節吏毋作小人儒  
細逕雖云捷通衢本不迂  
我言誠繆拙榮貴保無虞

題高唐李侯詩卷

佐命開基勇除殘去暴仁  
安榮三世將壽考百年身  
屈指排耆德如公有幾人  
罕开母小便長策應時新

贈答鄧州劉教授和鄉先輩

先生慎取友所友必端人細數釣臺舊唯瞻下榻賓再  
三蒙手誨款曲荷情親儻遂趨承問甘從夜達辰

父執幾人在先生是故交論心惟有鮑聯句每同郊夢  
破邯鄲黍枝分月夜巢何時從杖履吟詠看推敲

聖言仁者壽八十慶高年飲酒能終席歌詩動數篇借  
居文廟屋不種郭西田和氣春風裏行窩任醉眠

先君康健日軒蓋忽來過亂後相逢少燈前語舊多篇  
章成錦織論義發天和偶立青衿子於今雙鬢皤



有子傳身了無官處世輕數杯消永日四海仰高名應  
物聊隨俗成章為寫情惜無龐處士有酒可同傾

題醉經堂

名教廢已久異端千萬途淫辭溺浩蕩正路日荒蕪既  
以涇為濁寧分紫亂朱有人能獨立閉戶閱詩書

流憩園

耘軒坐來久幽念到荒園信手拈斑杖呼童啓棘門收  
除松落子檢點竹生孫只欠陶元亮閒情與細論

流憩園中樂無人解起予甘食勝食肉徐步當乘車不起彈冠念何妨與世疎家童知興倦歸路且籃輿

人生適意爾勇退脫官囚明月九霄鶴清江萬里鷗何勞求飲啄正欲任沉浮笑我黃塵裏棲棲向白頭

退食自警

居閒嗟弊政官守可忘心惡草不剪去嘉禾安得深察情三獻玉律已四知金千載絃歌政無人繼絕音

學優方入仕俯愧少知書臨事羞才困通方覺智迂一

誠吾自守百詭彼何如敢薄淮陽守吁嗟霜白鬚

送柴尚書雲南開府三首

海外來威德王封拜寵光何人堪護送公議得忠良使  
節風雷迅皇恩雨露涼從今不毛地三萬里農桑

煌煌都護府安定海南夷寬猛存吾法忠勤任俗宜農  
商皆皞皞雞犬亦熙熙聖鑑明於日毋言莫我知

炎方幾萬里軒蓋幾來迴海若驚忠節江神識俊材奇  
勲能獨立大閭欲誰開竹帛垂名了人生亦快哉

投宿洪贊

父母懸弧慶生兒願四方豈期無遠到浪走只空忙僕  
厭私裝重馬疲官路長慊投曾宿驛白首尚為郎

宿鵬窠

道旅喜相迎胡為復此行壯心今遂否華髮可憐生欲  
答還無語含羞自愴情本非經濟術難望貴公卿

送人之官

常令材勝職仕業日增光王業幽詩苦民時農事忙戶

儲三歲粟家植萬株桑何必居台鼎甘招謗議傷  
農人彫瘵久邑宰實非材念念宸心切皇皇賢路開姦  
賊無地入雨露自天回去去推恩澤昭蘇及草萊  
牧民如種樹摩撫不須繁獄市能無擾柴荆已自安桑  
麻深雨露雞犬散田園它日桐鄉廟豐碑定細刊

趙氏東臯八題匏瓜亭

趙氏園池裏茲亭太出奇尊壘厭金玉匏瓠作庖廐阮  
籍紫柳榼淵明白接羅誰能呼一起同與醉淋漓

宿無極縣

土壤瀕瀛海風煙自一方氣交才處暑夜寂便生涼老  
水易蒸雨積陰常勝陽妖蝗奪農力晚稼半成荒

幽青衝要地荒寂似邊城廬舍渾無幾丘墟葺未平屠  
沽常廢市雞犬僅聞聲縣解尤蕭索空庭草滿生

周錫齊桓履茲城乃壯疆邑名仍宿昔封吏幾更張地  
接天光迥風傳海氣涼因高求故跡瓦礫照殘陽

過陽信縣

荆榛雜桑柘，塊爾一荒城市。井增新屋田，疇起廢耕北。  
兵知畏法南，畝始聊生似。喜貧無擾熙熙里，巷情

再過居庸

滾滾隨行旅，遑遑愧此身。無名垂竹帛，有足走風塵。  
路省青山舊，人傷白髮新。迴頭望南土，又賞故園春。  
再過居庸口，悠悠今十年。歲華何迅速，官業却迢邰。  
關吏幾經換，山家亦變遷。惟餘崑下水，隨馬響涓涓。

失題

案原本係無題，但詩內稱忠宣謚法，不得謂之無題。無他本可校姑以失題系之以俟考謹識。

佐命惟勲舊忠清三十年赤心思報國白髮要寧邊夢  
破烏江月神迷瘴海煙忠宣拜嘉謚未讓伏波賢  
得死公無恨思賢民自哀方期當柱石奚想便泉臺廟  
貌祭如在銘旌哭遠來從今調鼎手誰繼作鹽梅

留別趙講師

擾擾黃冠底飄飄獨此身絕食煙火食終帶海山雲愛  
我同鄉舊乘風入市塵仙凡嗟異路攜手又輕分  
學貫天人際同塵誦老莊我知心志遠人喜舌鋒剛兩



袖飄仙馭雙瞳隱電光中條山色裏誰識呂純陽  
相見鄉情重相逢數日留丹砂元有術白髮莫盈頭未  
遂歸休計難同汗漫遊何時兩茅屋高卧白雲秋  
久聞隰吉路今日細經過危徑盤蚯蚓層田疊抱螺縱  
橫千尺澗上下百尋坡微雨成泥滑行人奈若何

寄子勉

憲府雖云久門深蔓草荒簷前喧鳥雀牆外走豺狼百  
怪羣妖集千鈞我弩强勝殘何日是亦復可憐傷

下馬鞍未解寃民如堵牆訟更十守令文積百筐箱逗  
遛行移密紛紜論議長我來片言決喜劇淚沾裳  
衰世已多感重重憂患深淒迷異鄉夢騷屑故園心弊  
久姦尤密才疎力不任願揮宗匠手垂教示佳音

寄伯宣尚書

霍家書畫後每每見新詩展玩同良語吟哦慰遠思慕  
君心似玉嗟我髮如絲健筆多佳作求聞絕妙詞

近聞薦賢狀羣彥悉無遺心廣非私愛人皆舉所知梗

楠支大廈麟鳳瑞明時勿為賢臣頌無人後措辭

寄李受益應奉

溪堂分袂後轉首十三年動靜時知悉從游久隔懸高  
軒才去暑倦客復離燕社燕秋鴻恨相望重惘然

玉堂膺妙選人恨十年遲四海知名早中年得位卑升  
騰多援引沈滯乏階資自有連城價端凝是所宜

寄子裕府尹

一別忽踰歲思君未少忘浪分萍梗散路隔海山長蹤

跡頗相似情懷亦可量不堪塵芥裏迎送日奔忙

杜榮季北行詩寄侍御飛卿

身為明時起人誰無此情豈徒要富貴政欲樹勲名閒  
竟開東閣爭先識賈生翩翩杜才子好謁漢公卿

應步知事求詩

清議清聲久皇恩禁網寬姦邪恃容養培克肆貪殘蹇  
謬忘生死忠貞出肺肝從今豺虎輩凜凜膽常寒

東臯

倚郭多農里東臯迥不凡池臺面塲圃花木作籬藩雞  
犬知迎客軒車屢擁門會看城市井易號管寧村

送柴尚書輩西南行

萬里西南道諸夷望撫劇賢王開幕府多士助春和農  
里行還業邊兵坐倚戈從今炎海水風軟不興波

寄郭都運員從善

一別五年久相逢未有涯豪英才益展衰朽鬢空華富  
國甘勞力無心為起家附書心計士鼓枻望仙槎

有感

貴賤雖殊體勞生共一塗紛紛強暴弱擾擾知欺愚  
福誰當禍無乘豈有除白頭州郡職轉欲賦歸歟

幸齋詩

屋漏元無愧胡為此幸名百年閒日月一芥貴公卿  
新酒東菑黍香羹北圃菁南軒一寄傲此樂有誰爭

游受卿北上詩寄賢姪杜孝先臺郎

南北人如織時時得好音  
亨衢才俊偉老我日侵尋  
莫

改冰霜操常堅玉雪心丈夫期遠到富貴豈能淫

耘軒詩

僮僕知人意來耘窓外禾芟夷除冗長培植看婆娑晚  
練煙光潤晨珠露氣和公倉及私廩露積反愁多

濟寧涖任後即事

老不任繁劇荒城愜所宜民淳詞訟少路僻送迎稀恩  
澤租庸減農桑風雨時心餘靜無事日夕掩柴扉

有感

辭賤來遊宦遑遑已十年為郎今白首潤屋只青氈  
契誠何敢依違甚可憐揚揚車蓋裏趨走避時賢

過龍門

不斷龍門豁滔滔一水來只能流歲月不解絕塵埃  
行客身奔走長途幾徃迴倚歌橋下柱富貴豈凡材

夜雨 并序

荆南每苦秋雨徹數日不止至元十五年雨暘時若  
秋九月十二日夜雨十三日雨一晝夜而止十四日



天宇晴霽氣清日明行旅農人不勝慶幸得五言八句

余生亦多幸所向值豐年百穀成時雨平疇少廢田市

聲傳萬口斗米欲三錢來歲仍無慮通宵喜不眠

客燕十年

客太原三年粟麥如糞土今歲湧貴十倍故篇首及焉

### 曹南冬至

今日陽生節羣陰自此消晝光行曳曳夜漏莫迢迢卦畫名來復黃鍾樂舞韶老年安化國白髮任蕭蕭

夜雨有感

哀年少眠睡秋雨滴寒更淅淅林梢響泠泠簷溜聲青  
燈靜相照白鬢豈重生念念還桑梓今宵故里情

至元十五年江陵重九

荆南兩重九猶未見歸期有恨詩難寫無歡盃倦持遙  
憐故園菊開徹水東籬却恨江城鴈無書謾送悲

寄吏部侍郎夾谷士常

銓調無多法惟憑信與公儻皆從請託未免屢西東降

黜因虛榜褒升匪實功傳聞山吏部一啓服羣雄

宿濟陽縣廨

亂餘公廨廢獨此頗安全廳壁仍存記庭槐似有年河  
壩成市井城腹少人煙共為求鹽利移家就旅船

寄彥良都事

舉刺無恩怨惟君意最公多冠重倚柱臺栢凜生風白  
日妖氛靜青雲賢路通更當思報國洗眼薦才雄

省幕秋雨

雨脚懸麻黑簷流注瓦喧端居蘭幕靜少遠市聲繁高  
稼知豐歲幽荒憶故園自憐林野質無計謝華軒

總管國祥秋滿北上

歲月急飛矢一瞬又三年衝要襍繁劇崇高待俊賢加  
餐心益壯臨政目能前老病交情重臨風惜別筵

五言排律

送信縣令樂平任滿東還

縣尹誠卑職煩勞責最先條條論國政一一自民編秋

徵輸稅春耕勸力田張燈昏理訟應限夜催錢但恐  
成逋欠安能問瘠捐頑嚚哀健訟水旱慮凶年賜半恩  
慈溥蠲征雨露偏府人同震電州介若鷹鷂星火憂違  
命衾幃未省眠愛民誠慘怛守職更愁煎貧窶衣鶉結  
逃亡室罄懸榜笞心不忍勸諭語空憐黽勉飢寒下銷  
磨戰伐前壘絲蠶不箔商課竈無煙墻外無餘地生平  
僅一廛有腸攻苦淡無夢到葷羶壯健他鄉外惇孤若  
箇邊婦嫠何寄倚叟獨更顛連身隻名猶在家亡賦尚

全力疲催種植體廢被干鋌不疾長三嘆無尤帶百愆  
千憂恒積慮萬事一呼天坐視羣黎苦慙持百里權去  
思那有頌遺愛若為篇賴有桐鄉令依稀似昔賢

憲臺傳旨召河東山西道提刑按察使劉侯還  
朝同列諸公作詩張宴祖道武安胡某作  
詩以為諸公倡

時政將多問宸衷憶舊臣天威顏咫尺風節照臣隣分  
豈同新進言當及大鈞從容論急務迺遷到疲民北顧

金山表南封瘴海垠初平慎懷撫未附細經綸久兵能  
少息四海不全貧地闊仁和國風清戰伐塵聖賢千載  
合文軌八荒均法盡無刊美人逢不世辰禹湯難並武  
堯舜亦推仁有類皆從願無生不獲伸雍雍三善樂穆  
穆四門賓臺諫得何舌謀猷不妄陳廟蒸怡聖祖郊祀  
格天神百穀穰風雨羣祥集鳳麟茲行期致此肯作備  
員人

